



PARLIAMENT
OF THE REPUBLIC OF SOUTH AFRICA

VA NA NA RITO

XIRHAMBO XA TINHLENGETANO TO TWA MIEHLEKETO YA VAAKI KOMITI YA VUANGAMERI YA HUVO YA RIXAKA EKA SWA VURIMI, SWIHLAHLA Na swa tinhlampfi

Hi ku fambisana na xikongomelonkulu xa Palamende xo hlanganisa ku nghenelela ka vaaki eka tiphurosese to endla timlawu, Komiti ya Vuangameri ya Huvo ya Rixaka eka swa Vurimi, Swihlahla na swa Tinhlampfi yi ta endla Tinhlengetano to twa miehleketo ya vaaki ePalamende hi mayelana na Nawumbisi wo Cinca swa Timhaka ta Swimakiwa swa Byalwa wa [B10 – 2016], Nawumbisi wo Cinca swa Timhaka ta Swihlahla wa Rixaka wa [B11 – 2016] na Nawumbisi wo Cinca swa Timhaka ta Ritshwa ra Nhova na ra Swihlahla wa Rixaka wa [B22 – 2016] hi Ravumbirhi wa ti 15 na Ravunharhu wa ti 16 Mhawuri 2017.

NAWUMBISI WO CINCA SWA TIMHAKA TA SWIMAKIWA SWA BYALWA WA [B10 – 2016]

Nawumbisi wo Cinca swa Timhaka ta Swimakiwa swa Byalwa wa [B10 – 2016] wu lava ku cinca Nawu wa swa Timhaka ta Swimakiwa swa Byalwa wa 1989 (Nawu wa Nomboro ya 60 wa 1989) ku endlela ku ngenisa tinhlamuselo tin'wana no cinca no sula tin'wana; ku lulamisela ku thiywa nakambe no vumbiwa nakambe ka Bodo ya Tiwayini na Swipiriti no hunguta matimba ya yona; ku lulamisela swilaveko hi mayelana na byalwa, byalwa bya xintu na swakunwa leswi virisiweke swin'wana; ku cinca xilaveko hi mayelana na mimpfumelelo leyi fambelanaka na swimakiwa leswi nga na xihoko swin'wana; ku nyika Holobye matimba yo hlalwula munhu loyi a nga ta nyika switifiketi swa nxavisela-vambe; ku fambelanisa swilaveko swo karhi na Vumbiwa; ku ndlandlamuxa matimba ya Holobye ku endla swinawana; ku nyika matheme lawa ma nga na ku ringana hi rimbewu; no lulamisela timhaka tin'wana leti fambelanaka na tona.

NAWUMBISI WO CINCA SWA TIMHAKA TA SWIHLAHLA WA RIXAKA WA [B11 – 2016]

Nawumbisi wo Cinca swa Timhaka ta Swihlahla wa Rixaka wa [B11 – 2016] wu lava ku cinca Nawu wa Swihlahla swa Rixaka wa 1998 (Nawu wa Nomboro ya 84 wa 1998) ku endlela ku lulamisela tinhlamuselo leti nga erivaleni ta swihlahla swa ntumbuluko na swa nhova; ku lulamisela vun'wini bya swipfuno swa swihlahla swa rixaka; ku tatisa ku tlakusiwa no vona ku landzeleriwa ka vulawuri bya swihlahla lebyi hetaka nkarhi wo leha; ku tatisa magoza lama nyikiweke hi Nawu ku lawula no tshinya ku tsemeleriwa ka swihlahla; ku lulamisela tiaphili ehenhla ka swiboho leswi tekiweke ehansi ka matimba na mitirho yo rhumisa; ku tiyisisa milandzu na swigwevo; no lulamisela timhaka tin'wana leti fambelanaka na tona.

NAWUMBISI WO CINCA SWA TIMHAKA TA RITSHWA RA NHOVA NA RA SWIHLAHLA WA RIXAKA WA [B22 – 2016]

Nawumbisi wo Cinca swa Timhaka ta Ritshwa ra Nhova na ra Swihlahla wa Rixaka wa [B22 – 2016] wu lava ku cinca Nawu wa swa Timhaka ta Ritshwa ra Nhova na ra Swihlahla wa 1998 (Nawu wa Nomboro ya 101 wa 1998) ku endlela ku cinca no ngenisa tinhlamuselo tin'wana; ku lulamisela ku hlanganisiwa ka mavumbele ya mihlangano yo sirhelela mindzilo hi masipala kumbe huvo ya mfumo wa xivongo; ku sindzisa masipala, bindzu leri nga ehansi ka vulawuri bya mfumo, mihlangano ya mfumo kumbe swiyenge swin'wana swa mfumo leswi nga vini va misava ku nghenelela mihlangano yo sirhelela mindzilo; ku ndlandlamuxa matimba yo nghena, ku secha, ku teka no khoma eka vatisa-ku-rhula na varhangeri va ndhavuko; ku cinca vito ra Nawu ri va Nawu wa swa Timhaka ta Ritshwa ra Nhova wa Rixaka; no lulamisela timhaka leti fambelanaka na tona.

Vanhu lava nga na ku tsakela na mitlawa leyi nga na ku tsakela leyi lavaka ku bumabumela hi mayelana na Milawumbisi leyi boxiweke laha henhla va komberwa ku tisa swibumabumelo leswi tsariweke eka Komiti ya Vuangameri ya Huvo ya Rixaka ku nga se fika Ravuntlhanu, ti 04 Mhawuri 2017. Vanhu lava nga na xiave lava tsakelaka ku endla swibumabumelo hi nomo va tlhela va komberwa ku endla swikombelo leswi tsariweke kumbe va thlanganisa na hofisi ya hina ku nga se fika Ravuntlhanu, ti 04 Mhawuri 2017.

Mapapila hinkwawo ma fanele ma kongomisiwa eka **Manana Machwene Rosina Semenya**, Mutshamaxitulu wa Komiti ya Vuangameri ya Huvo ya Rixaka eka swa Vurimi, Swihlahla na swa Tinhlampfi no funghiwa leswaku ma ya eka **Manana Albertina Kakaza**, PO Box 15, Parliament of the Republic of South Africa, Cape Town, 8000 kumbe imeyilela eka akakaza@parliament.gov.za kumbe fekisi: **086 694 3529**, riqingho: **(021) 403 3765** kumbe **083 709 8391**.

Xi humesiwile hi: Manana Machwene Rosina Semenya, Xirho xa Palamende Mutshamaxitulu wa Komiti ya Vuangameri ya Huvo ya Rixaka eka swa Vurimi, Swihlahla na swa Tinhlampfi.

Parliament. Making Democracy Work

www.parliament.gov.za